

ТОГТООЛЫН ХАВСРАЛТ

ШИЛДЭГ УРАН БҮТЭЭЛЧ ШАЛГАРУУЛАХ ЖУРАМ

Нэг. Нийтлэг үндэслэл

1.1. Уран бүтээлийн чанарыг сайжруулж, хүртээмжийг нэмэгдүүлэх, уран бүтээлчийн билэг авьяасыг үнэлэх, урамшуулах зорилгоор өмчийн хэлбэр харгалзахгүй соёл, урлагийн байгууллагаас оны шилдэг уран бүтээлч шалгаруулахад энэ журмыг мөрдөнө.

1.2. Жил бүр тайз, дэлгэцийн найруулагч, жүжигчин, зураач, тайз, дэлгэцийн бүтээлийн зохиолч, хөгжмийн зохиолч, продюсер, удирдаач, бүжиг дэглээч, хөгжимчин, дуучин, бүжигчин төрөл тус бүрт нэг шилдэг уран бүтээлчийг шалгаруулна. (Энэ дэд заалтыг Засгийн газрын 2020 оны 4 дүгээр тогтоолоор нэмсэн бөгөөд үүнийг 2021-1-1-ний өдрөөс эхлэн дагаж мөрдөнө)

Хоёр. Шилдэг уран бүтээлчид нэр дэвшүүлэх

2.1. Шилдэг уран бүтээлчид соёл, урлагийн байгууллага, хуулийн этгээд нь нэр дэвшүүлнэ.

2.2. Байгууллага, хуулийн этгээдэд хамаардаггүй энэхүү журмын 1.2-т заасан иргэнийг тухайн орон нутгийн Засаг дарга нэр дэвшүүлж болно.

2.3. Шилдэг уран бүтээлчид нэр дэвшүүлэхэд дор дурдсан баримт бичгийг бүрдүүлнэ:

2.3.1. уран бүтээлчийн дэлгэрэнгүй анкет;

2.3.2. эрх бүхий болон мэргэжлийн байгууллагын тодорхойлолт;

2.3.3. уран бүтээлийн жагсаалт;

2.3.4. шилдэг уран бүтээлчид нэр дэвшүүлэх үндэслэл, туурвисан бүтээлүүдийн онцлог, үр дүн, ач холбогдол;

2.3.5. тухайн онд улс болон олон улсын тэмцээнд оролцож амжилт гаргасан бол холбогдох гэрчилгээ, батламжийн хуулбар.

2.4. Нэр дэвшсэн уран бүтээлчийн мэргэжлийн ур чадварыг илэрхийлэн батлах зорилгоор видео, аудио бичлэг, CD, фото зураг, бусад баримт ирүүлж болно.

2.5. Байгууллага нь баримт бичгийг тухайн оны 12 дугаар сарын 25-ны дотор соёлын асуудал хариуцсан төрийн захиргааны төв байгууллагад ирүүлнэ.

2.6. Энэхүү журмын 2.5-д заасан хугацаанаас хоцорч ирсэн баримт бичгийг хүлээн авахгүй.

Гурав. Зөвлөлийн үйл ажиллагаа

3.1. Шилдэг уран бүтээлчийг Соёлын асуудал эрхэлсэн Засгийн газрын гишүүний баталсан орон тооны бус зөвлөл (цаашид "зөвлөл" гэнэ) шалгаруулж дүгнэлт гаргана.

3.2. Зөвлөл нь мэргэжлийн уран бүтээлч, найруулагч, соёл, урлаг судлаач, мэргэжлийн сургалтын байгууллага, төрийн болон төрийн бус байгууллагын төлөөллөөс бүрдсэн 9 хүний бүрэлдэхүүнтэй байна.

3.3. Зөвлөл нь нэр дэвшигдсэн уран бүтээлчийг сонгон шалгаруулах ажлыг жил бүрийн 01 дүгээр сарын 31-ний дотор зохион байгуулна.

3.4. Зөвлөл нь нийт гишүүдийн 85-аас доошгүй хувийн бүрэлдэхүүнтэй хуралдаж, олонхийн саналаар шилдэг уран бүтээлчийг шалгаруулах дүгнэлт гаргана.

3.5. Зөвлөлийн гишүүн нь нэр дэвшсэн уран бүтээлчийн мэргэжлийн багш, хамт ажилладаг болон төрөл садангийн хүн нь байвал тухайн чиглэлээр асуудлыг хэлэлцэх, санал хураахад оролцуулахгүй.

3.6. Тухайн жилийн шилдэг уран бүтээлчид нэр дэвшигчийн санал ирүүлээгүй төрөлд зөвлөл нь нэр дэвшүүлж, олонхийн саналаар шалгаруулж болно. (Энэ дэд заалтыг Засгийн газрын 2020 оны 4 дүгээр тогтоолоор нэмсэн бөгөөд үүнийг 2021-1-1-ний өдрөөс эхлэн дагаж мөрдөнө)

Дөрөв. Бусад зүйл

4.1. Зөвлөлийн гаргасан дүгнэлтийг үндэслэн соёлын асуудал эрхэлсэн Засгийн газрын гишүүн шилдэг уран бүтээлчийг шалгаруулсан тухай шийдвэр гаргана.

4.2. Шилдэг уран бүтээлчид "Мөнгөн мод" цом, батламж, 3.0 (гурван) сая төгрөгийн урамшуулал олгоно. (Энэ дэд заалтад Засгийн газрын 2020 оны 4 дүгээр тогтоолоор нэмэлт орсон бөгөөд үүнийг 2021-1-1-ний өдрөөс эхлэн дагаж мөрдөнө)

4.3. Шилдэг уран бүтээлчийг урамшуулах зардлыг жил бүрийн улсын төсөвт тусгаж санхүүжүүлнэ.

4.4. Шилдэг уран бүтээлчийн урамшуулалд олгох нийт хөрөнгийн 9 хувьтай тэнцэх хөрөнгийг уран бүтээлчийг сурталчлах,

батламж хэвлүүлэх, зөвлөлийн гишүүдийг урамшуулахад зарцуулна.

4.5. Шилдэг уран бүтээлчийг урамшуулахад зориулсан хөрөнгийг зориулалтын бусаар зарцуулахыг хориглоно.

---oOo---